

А кони митрополичи гнали берегом от Риги к Любку на Курскую¹⁴ землю, а попереk Жемотские земли 3 дни, и оттоле на Прусскую,¹⁵ и оттоле на Баморьскую землю, и оттоле на Жунскую землю, и оттоле на Висмертскую,¹⁶ и оттоле к Любку. И в Любок приехав един день господин¹⁷ в корабли, а с конми брегом, а поехали с конми из Ригы за шесть недель до поезда до митрополича.

И поеха из Любка на конех в пяток троицины недели и ночевал за четыре мили в граде Мелне. И бе бо около града того езеро, а з другую страну приведена река боле 20 верст из ве||лика реки Елевы. А от Мелна града 4 мили до реки Елевы. А от Елевы реки Мечь река, а перевоза попереk ея три версты. А от тое реки до Луньбрга града 2 мили. л. 115 об.

От Любка до Луньбрга 8 миль. Тои убо град величеством подобен ест Любку. И среди града того суть столпы устроены, в меди и позлащены, велми чудно, трею сажень и вышше; и у тех столпов у коегождо люди приряжены около тою же медию; и истекают из тех люди изо всех воды сладкы и студены: у единого из уст, а у инаго из уха, а у другаго из ока, а у инаго из локти, а у и||наго из ноздрию, истекают же л. 116 велми прудко, яко из бочек; те бо люди видети просте, яко живи суть, и те бо люди напояют весь град тои и скот; и все приведение вод тех велми хытро, истекание и несказанно.

А от Луньбрга до Брунзвига¹⁸ града 16 миль. И тои град величеством вышши тех градовъ прежних, и полаты в нем видети чудны, верхы их устроены; а покровение их велми подобно удивлению: ест бо крыто дъсками синего камени хитро и хороше, яко и лемешем, и утверживано гвоздиемъ, яко не мощно рушится во много лет. И еше суть реки вели||кы приведены по всему граду тому, береги их и дна морованы камен- л. 116 об. ным; а иные воды в столпы приведены, якоже и в предписанных градах. И все здание града того видети твердо ест и подивитися о сем.

А от Брунзвига до Батмера града II миль. Тои бо град величеством Любку подобен. И под весь град тои улицы морованы и полаты, а воды к нему приведены от Аламанские земли.

И от того града ест град именем Липес велми велик. А от того же града ест град именем Афрат, велик и чуден, и именем многым и хитрым рукоделием преумножен; и такового то||вара и хитра рукоделиа ни л. 117 в коем граде в предписанных не видехом.

А от того града ест град Бемибъверег,¹⁹ велик же и чуден. И ту празновахом праздник святых апостол Петра и Павла, и ту видехом: ходили с кресты по граду триста попов.

Да того же дни господин выехал из того града милю, и облегохом во граде именем Понт, а река под ним зовома Тиск, и того ради зовется тои град именем Понтенск. И тои убо град окааннаго Пилата. В том бо граде вотчина его и рожение, и по граде зовется Понтийский Пилат.

И от того града ест град Нурбех, велми велик и кре||пок. И людии л. 117 об. в нем много, и товара; и полаты в нем деланы белым камением, велми чудны и хитры; тако же и реки приведены к граду тому великими силами хитро; а иные воды во столпы приведены хитрее всех предписанных градов, и сказати о сем убо не мощно и недомыслено отнудь. От Любка до Нурбеха 100 миль.

И тьи Нурбех град стоит среди Аламанские земли. Аламанская земля, то ест не иная вера, ни ины язык, но ест едина вера латиньская, а язык немецкий же, но разно, яко и Русь Сербы, тако и оне с немьци.

¹⁴Испр. по М.; в ркп. рускую. ¹⁵Доб. землю М. ¹⁶Доб. землю М. ¹⁷Доб. морем М. ¹⁸Испр.; в ркп. Дубрунзвинга. ¹⁹Бемирверег М.